

新元史

列傳

第九至第十四

第叁拾貳冊

列傳第九

新元史卷之一百一十二

賜進士出身日講起居注官翰林院侍讀國史館纂修膠州柯劭忞撰

定宗諸子

忽察

腦忽

禾忽

秃魯

憲宗諸子

班秃

阿速合

玉龍答失

撒里蠻
徹徹秃

昔里吉

兀魯思不花
晃火帖木兒

定宗三子長忽察次腦忽次禾忽

忽察以定宗長子覬覦父位而眾望不屬及拔都等定議立憲宗忽察心不能平謀作亂憲宗卽位大會諸王忽察與弟腦忽從兄失烈門藏兵車中載以至事覺訛鞫得實忽察腦忽免死安置於和林西失刺豁羅罕之

地忽察子完者也不干腦忽無子

禾忽襲定宗大名路歲賜故時稱大名王其分地在葉密立亦定宗潛邸之分地阿里不哥僭號脅禾忽從之然禾忽實欲東覲世祖中統三年徙於忽只兒之地與察合台後王阿魯忽合兵拒阿里不哥未幾還葉密立阿里不哥兵至又徙於孛劣撒里展轉至不刺城留妻孥輜重於徹徹里澤刺山阿里不哥將哈刺不花來襲禾忽與阿魯忽合兵敗之斬哈刺不花函其首告捷四年春阿里不哥兵復至禾忽與阿魯忽拒戰於渾八升城失利阿里不哥以糧盡引還遂與禾忽阿魯忽議和

五年與諸王八刺同時賜帛六萬匹海都叛禾忽附之
爲丞相安童所襲盡失其輜重子禿魯至元九年從皇
子西平王奧都赤征建都蠻封南平王賜龜紐銀印仍
賜金銀符各五及所部有功者三十五人銀鈔定衛士
人各馬三匹從者一匹明年換駝紐鍍金銀印命鎮守
六盤山及聞其父禾忽已附海都卽於十四年冬舉兵
反安西王遣鞏昌總帥汪惟正等西討敗禿魯於武川
獲之

憲宗四子長班禿次阿速台次玉龍答失次昔里吉

班禿憲宗七年與弟玉龍答失昔里吉從車駕渡漠至

玉龍棧赤八年卒於吉河之南無子泰定三年詔以憲宗明里忽都魯皇后守班禿營帳

阿速台初與玉龍答失昔里吉俱附阿里不哥察合台後王阿魯忽敗阿里不哥將哈刺不花恃勝輕敵還駐亦刺八里不設備阿速台率所部襲之入自鐵門奪其阿力麻里城至元元年從阿里不哥歸命至京師世祖宥之

玉龍答失初附阿里不哥中統末阿里不哥失勢部眾多棄之而從玉龍答失阿里不哥藏憲宗玉璽玉龍答失索取之至元元年奉璽來歸世祖悅賜印並賞以先

朝獵戶三年以阿速台原賜衛輝路爲其分地二子曰
撒里蠻曰完澤撒里蠻至元十四年從河平王昔里吉
叛已而相攻十九年執昔里吉來獻世祖宥其罪仍賜
以地完澤元貞二年賜印九年封衛安王賜金印至大
三年進封衛王換獸紐金印完澤二子曰徹徹禿曰寬
徹哥徹徹禿至治二年奉命總兵北邊是年十二月封
武甯王賜駝紐金印三年泰定帝入繼大統命徹徹禿
月修佛事於嶺北以禳寇兵泰定元年命統其父完澤
所部給以衛王印天厯元年奉文宗命迎明宗於金山
明年明宗卽位於和林之北遣徹徹禿與平章哈八兒

禿自行在致命京師立文宗爲皇太子至順二年以淮
安路甯海州之朐山贛榆沐陽三縣爲徹徹禿食邑進
封郟王換獸紐金印明年徙鎮遼陽後至元二年以江
南太平路戶鈔益徹徹禿歲賜三年又以完者帖木兒
位下蘇州水田二百頃賜之五年冬爲丞相伯顏誣搆
矯詔賜死伯顏蔑兒乞氏其先世本隸於憲宗爲家奴
凡家奴稱主人曰使長貴賤不易其稱徹徹禿爲憲宗
曾孫伯顏見徹徹禿宜稱使長至是怒曰吾位極人臣
豈尙有使長遂誣奏徹徹禿謀爲不軌殺之是日大風
霾廷臣皆冤之脫脫爲右丞相始奏雪其冤復爵邑寬

徹哥至順間襲封衛王後至元二年以衛輝路五戶絲
賜之至正十一年與知樞密院事也先帖木兒討河南
妖賊禽韓咬兒送京師誅之

昔里吉至元元年從阿里不哥至京師五年六月封河
平王賜駝紐金印未幾從皇子北平王那木罕備邊駐
阿力麻里十四年諸王脫黑帖木兒藥木忽兒撒里蠻
合謀劫北平王械繫丞相安童奉昔里吉以叛犯和林
詔丞相伯顏總諸軍討之河間王忽魯台始從之及是
率所屬來歸與伯顏軍合昔里吉等與伯顏夾幹魯歡
河而軍相持未戰諸王牙忽都爲昔里吉所囚潛使人

以敵情來告及戰牙忽都自後亂其陣昔里吉敗走明年土土哈率千騎踰金山追之禽其將札忽台進戰於寬徹哥又敗之昔里吉走乞兒吉思至野孫河又爲哈答所追敗遁額兒的失河脫黑帖木兒欲奉撒里蠻爲主脅藥木忽兒不從而與之戰禽脫黑帖木兒歸昔里吉殺之昔里吉遂執撒里蠻致於朮赤後王寬徹道過訛跡刊爲撒里蠻舊部所要奪還攻昔里吉時昔里吉爲幹赤斤後王別里帖木兒所襲敗部眾迸散爲撒里蠻所執十九年獻於朝流海島而卒三子曰兀魯思不花曰晃火帖木兒曰火兒忽兀魯思不花其父被執後

率餘眾附於海都元貞二年與藥木忽兒等棄海都來
歸大德元年入朝增兀魯思不花與藥木忽兒歲賜鈔
千錠是年三月又賜金百兩賜其母阿不察等金五百
兩以乳牛牝馬賑其部饑民四月賜兀魯思不花圓符
十一月賜金千兩明年六月又賜兀魯思不花及其母
金千兩銀有差成宗加意撫慰以勸未至者故賞賚獨
優焉至治三年預鐵失逆謀流於海島死晃火帖木兒
延祐五年封嘉王賜獸紐金印泰定二年徙封并王仍
賜獸紐金印以嘉王印賜其弟火兒忽至順三年以安
陸府爲并王食邑後至元元年燕帖木兒子唐其勢怨

望謀廢帝而立晃火帖木兒事覺唐其勢伏誅晃火帖
木兒自殺謫其子孫戍邊明年賜其母答里鈔千錠至
正二年赦其子徹里帖木兒歸封爲撫甯王

新元史卷之一百一十二終

興藥木兒等棄跡跡來

列傳第十

新元史卷之一百十三

賜進士出身日講起居注官翰林院侍讀國史館纂修膠州柯劭忞撰

世祖諸子上

皇太子真金

甘麻刺 梁王松山 王禪
答刺麻八剌 魏王阿木哥

世祖十一子長朵兒只早卒次真金次忙哥剌次那木罕皆察必皇后所出次忽哥赤次愛牙赤次奧魯赤次闊闊出次脫歡次忽都魯帖木兒均不詳其母名氏次鐵蔑赤南必皇后所出

皇太子真金少從姚樞竇默授孝經又命王恂伴讀及卒業世祖大悅設酒食饗樞等中統三年封燕王守中

書令丞相史天澤入白事真金曰我幼未習祖宗法令
一旦當大任公耆德宜有以弼我復謂贊善王恂曰省
臣所啓爾宜與聞之四年兼判樞密院事至元二年奉
詔居潮河是年八月還京師七年秋又命巡撫稱海冬
還京師閒謂諸王札剌忽及從臣伯顏等曰吾今有暇
宜各誦所聞俾吾效之於是撒里蠻曰太祖有訓欲治
身先治心欲責人先責己伯顏曰皇上有訓欺罔盜竊
人之至惡一爲欺罔則後雖出善言人終弗信一爲盜
竊則事雖未覺心常惴惴若捕者將至札剌忽曰我祖
有訓長者杪深者底蓋言貴有終始長必極其杪深必

究其底不可中輟也王曰皇上有訓毋持大心持大心
事必隳敗吾觀孔子之言卽與聖訓合也十年二月立
爲皇太子仍兼中書令判樞密院事受玉冊文曰皇帝
若曰咨爾皇太子眞金仰惟太祖皇帝遺訓嫡子中有
克嗣服繼統者豫選定之是用太宗英文皇帝以紹隆
丕構自時厥後爲不顯立冢嫡遂啓爭端朕上遵祖宗
宏規下協昆弟僉同之議乃從燕邸立爾爲皇太子積
有日矣比者儒臣敷奏國家立儲嗣宜有冊命此典禮
也今遣攝太尉左丞相伯顏持節授爾玉冊金寶於戲
聖武燕謀爾其承奉昆弟宗親爾其和協使仁孝顯於

躬行抑可謂不負所託矣尙其戒哉勿替朕命九月立
宮師府設官屬三十有八員十一年太子下教中書聘
奉元處士楊恭懿如漢惠帝聘四皓故事太子嘗有疾
世祖臨幸親和藥賜之遣侍臣李眾禱祀嶽瀆及名山
大川太子戒眾所至郡縣勿煩吏迎送重擾民也初太
子守中書令將入省署勅乳母進新衣笑却之曰吾何
事美觀也及爲太子服綾衿被藩漬命重加染治左右
請更製之太子曰吾欲織百端不難顧是物未敝豈宜
棄之東宮香殿成工請鑿石爲池仿曲水流觴太子曰
古有肉林酒池爾欲吾效之耶不許每與諸王近臣習

射之暇輒討論經史若資治通鑑貞觀政要許衡王恂
所述遼金帝王行事要略意所允愜必爲之洒然動容
時侍經幄者如王恂白棟皆朝夕不出東宮待制李謙
太常宋徽亦時加咨訪按察副使王惲進承華事略二
十篇一日廣孝二曰立愛三曰端本四曰進學五日擇
術六曰謹習七日聽政八曰達聰九曰撫軍十曰明分
十一曰崇儒十二曰親賢十三曰去邪十四曰納誨十
五曰幾諫十六曰從諫十七曰推惡十八曰尙儉十九
曰戒逸二十曰審官宮臣進讀至漢成帝不絕馳道唐
肅宗改絳紗袍爲朱明服大喜曰使我行之亦當若此

及說邢巒止齊太子食邪蒿顧宮臣曰菜名邪蒿未必
果邪雖食之豈遽使人不正耶張九思對曰古人設戒
義固當爾太子善其言賜酒勞之命宋衢擇可備顧問
者衢以郭祐何瑋徐琰馬紹楊居寬何榮祖楊仁風等
爲言太子曰是數人者盡爲我致之宜自近者始遂召
瑋於易州琰於東平仁風於潞州贊善王恂卒太子聞
之嗟悼賻鈔二千五百緡一日顧謂左右曰王贊善當
言必言未嘗顧惜隨事規正裨益良多今鮮有其匹也
會議立門下省世祖欲以廉希憲爲侍中希憲辭以疾
太子遣人告之曰上命勿辭羣小爲難吾爲公除之然